



Rabu, 25 Nopember 2020
Ogen: Esekiel 22:17-19



Bali Ras Sampah



Ibas peleburen logam, lit hasil sisa si igelari “sanga” bas cakap Indonesia. Sanga e bentukna padat. Pabrik-pabrik galang biasana lanai ipakena e sabap enggo ikira sampah. Tapi tukang-tukang kitik ibuatna janah iolahna ngulih, sabap lit denga sitik nari kal sisa-sisa logam si banci ipakena arah sanga ndai. Erkiteken kejahatan bangsa Israel ras pemberontakenna, ia nggo kebenen kemulian Dibata. Bangsa si ipilihna, si ergaiNa lebihen asangkan emas, permata, gundari enggo idahNa bagi sanga, bali ras sampah. Perbahanen, lagu langkahna kerina terjeng ngukuri dirina jine, jahat ras la adil perbahenna man kalak musil, bangsa e lanai ncidahkan maka Dibatakap punana ia. Isembahna berhala-berhala si kin ia jine erbahansa, munuh ras nipu bage perasatna. La lit sada pe bas bangsa e si mehamat man orang tuana, bangsa si deban itipuna ras idaramina untung arah diberu balu-balu ras anak melumang. La sitik pe ia mehamat man ingan-ingan si badia janah wari Sabat pe lanai iperdiatekenna. Deba erlua-lua, anak si dilaki ipedemina nande ngudana. Deba igodana permainna tah pe turangna pedauh nande. Lit deba pembunuh bayaren guna ndatken duit, lit ka si mungaken duit man seninana, ibuatna keuntungen i bas seninana nari. Kebayaken doni, pujin manusia jadi perayakenna. Amin pe ikataken Dibata bangsaNa e desken sampah, la kepe iambekken bage-bage saja lanai lit si empuna, tapi ipepulungNa mulih, ibabana ka ku bas ingan peleburen gelah kerina si melketna nangtang, janah kiniulinna ulih ersinals. Bageka me kerna kegeluhenta secara pribadi. Banci jadi si akap perban dosanta enggo erpenulak Tuhan banta. Nina Dibata “*labo ndigan pe kam kutadingken,*” “*amin gia dosanta enggo bagi si ngkelat megara, tapi iburihina ngulih bali bagi salju.*” Sada ngenca ipindona, gelah siakuken dosanta, je nari jera, maka kematenNa i kayu persilang ngurasi dosanta. Atan kita ngulih kempak IA, si eteh ngulih tujun geluhta i doni enda.